

西域聞見錄



西域聞見錄卷三

外藩列傳

哈薩克

哈薩克伊犁西北大國也。即古大宛。乾隆二十一年大兵入其巢穴。其汗阿布賴面降歸化。受封爵奉正朔。人民土宇悉入版圖。其地無城郭屋宇之定。居不藝五穀。羶帳為家。遊牧為業。分布散處。亦無愛曼聚落。地多平岡漫嶺。草生被野。綠葉白根。長四五寸。牲畜食之。易於腓字。稱其君曰比。相呼皆以名。今其王名阿布賴圖人。皆呼之為阿布賴比也。幅頓遼廓。人戶殷繁。牲畜衆多。富者牛馬以萬計。羊無算。人共妻輪流。晏處生子。至十



六歲輒析產與之。牲畜使自為計。宴以駝馬牛羊為饌。馬潼為酒器。用皆以木為之。富者用銅錫以衣。多為華美。雖夏月炎暑亦被服八九層。而後赴筵。最愛中國瓷。器茶葉襍色梭布及片金倭緞之屬。得之寶貴。綢緞綾絹不復愛重矣。無刑罰紀律。王之命令亦不甚遵。如人有罪則衆共紛議。罪小罰之。牲畜罪大則共殺之。而分其產亦不必闕白於王。即禦外戰鬪之事亦其王與衆約會不願者不相強也。歲有納中國之稅。牛馬百取一。伊犁將軍遣官入其國征收。其王與頭目人等征之於衆。初則大費躊躇。蓋其人意以為天生水草天產牲畜。我等自費經營。如何有貢賦之說。其王反復開導。然後



勉從○然亦未致缺額而今則輸將恐後矣○哈薩克兩種  
 其一為阿布賴比○及其弟阿布爾必斯○阿布爾班必並各  
 台吉所屬○與伊犁捷拉巴哈台連界○臣服中國○每年驅  
 其牲畜至邊交易○綢緞而去○其北界之哈薩克○又是一  
 種○未通中國人戶○尤強盛云

布魯特

布魯特○回子部落也○地界安集延○喀什噶爾之間○地廣  
 人衆○稱其君曰比○或有管理一二千愛曼者○或有管領  
 二三十愛曼者○愛曼人戶○即其阿拉巴圖○雖皆為布魯  
 特○而其比不一○各君其地○各子其民○力敵勢均○不相統  
 轄○不蓄一髮○如其比死○即立其比之子○若弟○他人不與

也忌猪肉衣窄袖敞前襟帽短方平頂女子插雉尾以  
飭貌風俗語言與回疆大同小異羶帳為居遊牧為業  
以肉為食牛馬乳為酒有額魯特之風喜中國瓷器茶  
葉綢布烟酒珍之如寶人貧而性悍輕生重利好殺掠  
剽奪勇於鬥戰哈薩克博羅爾皆畏憚之即準噶爾強  
時亦不能使之臣服回子出邊及外國入內貿易者往  
往為其虜掠而去大兵平定西域後始戢不敢騁其各  
比每年遣使至烏什與叅贊大臣請安進貢  
大皇帝馬匹繹絡不絕乾隆二十三年大兵討霍吉占  
其附近喀什噶爾之布魯特比阿奇木震攝  
天威帶領所部愛曼人戶阻攔霍吉占悉力與戰

上嘉悅許其功。加其比阿奇木為散秩大臣。授職為塔什伯里克回城之阿奇木伯克。其餘頭目皆賞戴頂翎。有差令其部下人戶。襍處於葉爾羌喀什噶爾烏什之深山密林中安居游牧焉。

### 安集延

安集延。回子部落也。其汗額得訥最為著名。其既死。其弟納拉帕搭立。統領四城。最大者曰豪罕。三萬餘戶。為其罕之巢穴。次曰瑪拉噶朗。二萬餘戶。次曰柰曼。萬餘戶。最小之城曰安集延。千戶耳。四城人皆其汗之阿拉巴圖。乾隆二十三年。歸附中國。在布魯特之西。有城池屋宇。村堡田園。業耕種土產。穀豆瓜菓皆備。而桃稱獨

絕畜牛馬恒圍獵人不蓄髮辮禁猪肉衣圓領窄袖帽  
方無翅其人載貨行賈冒雪霜犯危險經年累歲不獲  
利不歸內地皆呼之為安集延回子亦猶回子回子至  
外國總呼之為喀什噶爾回子也

博羅爾

博羅爾西域別一種也在葉爾羌西以土築屋而居有  
村落無文字不通回子語言惟衣帽與安集延彷彿其  
人深目隆鼻繞喙濃髭其風男女無別恒兄弟四五人  
共娶一妻次第歇宿以靴懸戶上為記生子女亦以次  
第招認無兄弟者與戚里夥之以齒為序地多沙磧鹽  
鹵可耕者稀人多苦貧歲收不過二麥一半畝而已多

桑取葑晒乾為糧或山羊之乳借以餬口馬漣為酒稱其君曰比以人為賦稅凡生子女六七人則納其三四五則納其二所賦子女皆鬻於溫都斯坦哈薩克安集延及內地各回城為奴婢值頗昂每口以五六十八九十金為率性怯懦往往為布魯特沙關記擄掠人口鬻於他處亦不能較

### 教罕

教罕一大國也回子謂之克則爾巴什在退爾木沙之西其地絕長補短方數千餘里稱其王曰汗城池壯麗人戶富盛天氣酷熱多雨多奇花異菓五金珠玉寶石金剛石松竹杉皆其土產有瘴氣多猩猩亦通人言語



巨蟒長蛇熊羆虎豹不一而足地產象耕田負重皆取  
於象牛間有之如中國之象男女聚觀以為罕物風俗  
淫佚無人倫尤重男色人人皆有妓童童之袴皆繫束  
而以細鎖鑱之以防外遇其種不一有與內地回子相  
似者有與安集延相似者有與額魯特土爾扈特相似  
者有髮鬚卷曲與鄂羅斯相似者又有一種亦回子衣  
帽但目益深鼻亦高睛碧色鬚繞額如蝟赤如丹沙多  
力而橫遇有戰陣輒為前鋒無火鎗弓矢專用木干矛  
冲突於矢石之間矯捷無倫其鬚用茜草染之以為丰  
采西域人皆畏之又有一種圓領大袖衣冠類漢唐之  
製貌多清秀似朝鮮人或謂是後漢之遺種云人類雖

別各有部落頭目。然皆教罕之阿巴拉圖奉其教令而  
侵令相尚。劫掠成風。既大遠於中國。聖人之教又不解  
佛教慈悲之說。嗜殺好利。篡奪相循。與溫都斯坦地界  
毗連。各以威力相制。迭為強弱。乾隆二十年後。與中國  
通歸入  
王化  
上憫其險。寬其歲入之常。朝貢輸獻亦無定制。惟聽其  
抒誠而已。

溫都斯坦

溫都斯坦亦西域回國之大者。在葉爾羌西南。馬行六  
十餘日。至克食米爾。克食米爾復西南行四十餘日。至

温都斯坦水亦可通兩地貿易之便往來不絕稱其王  
曰汗其都城雄壯周圍六十餘里轄大小回城三百七  
十餘處其人深目高鼻多鬚目睛黑白光如琉璃面黑  
色語言類鳥鳴回子不能辨衣敞前襟帽纏花布厥土  
黑墳地極溽暑瘴癘為害人有頭面生癩瘤引之而長  
放之仍縮者地以象耕負重致遠皆取給焉有牛馬無  
駝羊騾驢不解游牧粳糯杭稻及瓜果蔬菜靡不繁植  
檳榔欖櫚橘柚在在成林冬不凋葉人習技考金漆雕  
鏤制作精奇所製玉器薄如蟬翼文成如髮抽金銀為  
絲織綢緞羶布遍貨於西域各國及各回城所居穴地  
深數丈旁掘土洞為室室亦精絕飾以金玉從無地上

起屋并園亭之事故入其城村似曠遠無人烟處也外  
大澤山朗水麗花木蔚然居人多携眷乘舟累月經旬  
游於其內多美釀尚宴每會必費數百金亦多泛酒泛  
舟於澤中者凡其地之公私事務及一切農工商旅操  
作交易皆於夜間為之日出則伏國既富庶風俗奢靡  
其地亦有玉山獨少白玉金價過黃金最貴中國之資  
器或有携至其國爭以白玉盤盃交易而去惟恐失之  
而大黃尤為至寶以黃金數十倍兌換蓋其地一切疾  
病瘡瘍得大黃即愈百不失一貴客來及大筵會皆以  
大黃代茶若經年不服大黃則必死故雖貧苦小回亦  
必有一半兩大黃囊繫胸前舌舔而鼻嗅之其地之江

河皆通洋海時有閩廣海航到彼停泊多有以大黃漁  
利者故廣東福建之物往往有之或重販至葉爾羌轉  
入中國矣喀什噶爾回子買得漳緘一端上有漢字天  
順字號固閩貨也其國西隅有巨澤圍數千里澤中有  
山圍逾千里萬峰聳峙高入雲天或曰人間第一高山  
也名曰牽各里麻坦達喇斯山中產獅子每於秋月皎  
潔輒負雛於山中往來頭大而毛虬尾形如帚黃質黑  
章如虎皮長六七丈時登山之絕頂望月垂涎咆哮跳  
躑猛飛吞月有飛去八九里十餘里而墜死於山谷中  
也其國人以豢養獅子為上戶每當秋月其汗使人取  
之以精鐵作柱大釜如密布層遮圍而畜之於其中飼



以牛時而吼如雷霆滿城震動人畜不寧取之之法擇  
炮手之最精者開地為阱人匿其中遇有負雛來者乘  
其不備發炮斃之而取其雛倘一炮不中則拋山裂石  
人無噍類矣

克什米爾

克什米爾回子一大國也在葉爾羌西南馬行六十餘  
日可至其國中隔一冰山人畜至此須土人駝牽而過  
其險尤甚於木爾爾塔板其人深目高鼻黃睛多鬚衣  
圓領窄袖無髮辮飲食尤多禁忌禮拜尤多虔語強半  
可通稱其君曰汗所屬回衆近百萬戶城池周三十餘  
里時序平和冬無嚴寒夏無酷暑地土沃饒產名香白

檀紫降人多奇巧精於闢瘴之術能於山麓起樓引水  
逆上自樓後倒垂前檐如水晶之簾善貨販興利江河  
之水多通洋海俗尚宴會喜歌舞娶婦花燭之夕輒先  
有物入洞房新婦輒昏瞽聽其淫污而去亦不知為何物  
從古至今萬千不爽天時和正山水媚秀溫都斯坦之  
富商多家於此

巴達克山

巴達克山回國也在葉爾羌西馬行三十日可至其地  
羣山環繞田土膏腴築居室以居耕田而食亦有牧放  
圍獵之利禁猪肉衣帽同安集延稱其君曰汗愛曼人  
戶四五萬皆其汗之阿拉巴圖風尚淫蕩喜男色土產

米豆棉花菓瓜寶石黃金乾隆二十三年霍吉占叛兵  
由葉爾羌敗走巴達克山欲奔溫都斯坦其汗蘇爾坦  
沙率兵截路出戰霍吉占及其兄布拉敦皆死悉獲其  
輜重眷屬獻之中國並俘送霍吉占弟兄之尸蒙  
上賞布拉敦之子薩木薩克與其黨千人突圍走退木  
爾沙之汗留之因唆令退木爾沙之汗向蘇爾坦沙索  
取人口不與兩國遂成仇敵互相戰鬥相持二年巴達  
克山大敗為退木爾薩所滅回衆遭擄近年來逃亾人  
口漸集故地有千餘戶矣

退木爾沙

退木爾沙巴達克山之西一回國也人七萬餘戶地悉

萬山之中草肥水甘牲畜蕃息以氈帳為家游牧為業  
稱其君曰汗國無貧人而强悍性成剗掠成俗帽方而  
上平靴以牛羊革為之衣敞前襟窄袖束腕有布魯特  
之風乾隆二十三年布拉敦之子薩木薩克逝至其地  
唆使滅巴達克山教罕聞之大怒退木爾沙巴達克山  
原係隣好素無仇隙奈何因他人之事自相殘辱不義  
孰甚因大起兵甲往侵退木爾沙一鼓而滅之退木爾  
沙之汗亦族薩木薩克亦被擒今所存者亦止千餘戶  
耳

沙關記

沙關記者葉爾羌回子也為霍吉占之黨羽大兵底定

回疆霍吉占弟兄伏誅沙關記迯至外藩無人之境苟  
延性命同時迯竄之回子及額魯特人等漸集其地羣  
推沙關記為君有衆五千人鐵甲三百副鳥鎗五百桿  
踞空濶之地起屋宇墾土田漸加殷庶其人凶暴喜殺  
常為中外貿易商旅之害夙與葉爾羌阿奇木伯克鄂  
對本係仇讎乾隆四十一年鄂對之貿易回子誤入其  
地沙關記即行擒縛畏  
天朝之威不敢殺戮置之地牢中四十日沙關記忽將  
自己父母妻子女妾盡皆綁出喚出鄂對之貿易回子  
令其看視而問曰鄂對在葉爾羌敢殺人否回子曰有  
天朝之法度在不敢私殺人沙關記曰鄂對且不敢



殺人如何算得好男子。我不但敢殺人，且敢殺我之父母妻子。遂俱行凌遲。放鄂對之回子歸葉爾羌，使告之鄂對。沙關記之利害如此。沙關記之回子亦被鄂對捉得，置地牢中六十日，放出，令其遍觀城池，人戶牲畜器械寶玉瓷器綉緞之類，亦使其歸告沙關記。鄂對之利害如此。其地在葉爾羌西馬行三十餘日，沿途以馬通為炊。沙爾雅伊什罕伯克阿拉呼里隨將軍惠兆平定葉爾羌時，曾奉令往探其地，因戈壁甚大，無榮草，未能進兵勦滅也。

### 塞克

塞克西城一大國也。在教罕西，絕非回子種類，稱其王

汗部○落數百處○各有統轄之人○皆其汗之阿拉巴圖事  
權歸一○無跋扈叛弒之事○城池巨麗○人民殷庶○居室寬  
敞○整潔○人家院中各立一木杆○向之禮拜○冬夏和平風  
俗坦○白○尚宴會喜歌舞○以猪肉為上饌○野牲為常食○人  
人多力善射○發必中○佩標鎗五枝○長四五尺○取物於百  
步之外○與教罕稱勅敵也○

子  
子  
子  
子

西域聞見錄卷四

外藩列傳

鄂羅斯

鄂羅斯北邊之大國也。東界海，南界中國，西北隣控噶爾。東西距二萬餘里，南北窄狹自千里至三千餘里不等。稱其王曰汗。自鄂羅斯之察罕汗沒，無子，國人立其女為汗。嗣後皆傳女。迄今已七世矣。仍襲其祖名號。故國人猶稱為察罕汗也。其女主有所幸，或期年，或數月，則殺之。生女留承統續，謂其汗之嫡嗣也。生男則以為他人之種也。其人深目高鼻，碧睛，日髮鬚赤黃。男女皆蓄髮，男髮頻以膠水刷之，使其卷曲。女髮梳為高髻。男



衣縛身。遍體扣繞。女衣裙衫袍袴。悉如漢粧。但不纏足。耳無褻衣。故裙長而兩襲。以銀為錢。鑄文肖其汗之面。重七錢。餘謂之阿拉斯朗。以洋算成歲。分至啟閉。建閏。日月蝕。織杪無差。喜樓居有四五上者。其梁柱頂壁皆用木。密灌油灰。不需瓦壁。而金粉雕鑿。極盡人工。開窓四達。或飭以各色玻璃。或縷金銀絲。以隔蔽之。次用其國之田皮紙。率皆修整可觀。木多易遭回祿。故火禁嚴。一有不虞。則家灰燼室中。皆床几椅橙。酷似南方。男女皆不能盤膝坐。一日兩浴。見親友賓客。無跪拜揖讓之儀。惟接吻。以為禮。嗜茶。然必調糖而啜之。食以麥麩為常饌。魚為上品。猪次之。以大茴為佳味。人人嗜之。穀米。



則充牲畜棧豆而已。都城雄壯，圍數十里。官制分文武，皆懸刀為佩。刀柄有金玉銀銅錫鐵之別。官階等級視其刀柄而知。其民皆耕田納稅。三丁抽一，五丁抽二，以爲兵。兵各有營，自十六歲入營，給以馬匹器械，即不準歸家不娶妻。日居營中，習學訓練。遇有戰陣之時，則隨將領而去。月支阿拉斯朗錢一文，糧一石。年至五十而後去。伍刑罰極嚴。男犯盜，女犯姦，殺人不問謀，故鬥毆以及出邊私入別國者，概以斧剝殺之。其國名山大川甚多地。之肥沃，鹹鹵亦錯。襍不齊。土產白糖、冰糖、紙、茶、噶拉明鏡、玻璃、元狐、黑貉、捨狝、獾、銀鼠、灰鼠、海龍、水獺。但金銀缺少。其餘菓蔬之類，咸備。鄂羅斯本控噶爾屬。

國稱臣納貢由來已久乾隆二十年察罕汗恃其強大  
不復稱臣缺其貢獻復興兵擾其邊境以故兩國連兵  
數年鄂羅斯累敗喪師二十餘萬大困不支仍復稱臣  
常貢外歲增納童男女各五百而後罷兵其俗最重君  
臣之義如其汗雖極無道亦不敢議其是非故無叛逆  
篡奪之事一姓相傳幾千年矣視他國之朝夕易姓者  
相懸矣按西北域記鄂羅斯一名羅刹古丁零國也夜  
短晝長多江湖通舟楫土產五穀六畜百菓諸蔬及玻  
璃色氊金紙白鐵紅黑牛皮皮毼之屬其哲面隆準深  
眶綠睛亦有黑睛者漢李陵裔也卷髮赤髭衣衫裹身  
履無前齒嗜酸辛貧杯酌餐薨羶飯糝粒橫板為屋柵木

為城鑄銀為錢編石為簡其教宗也蘇康熙年間始於  
中國通遣其俊秀入我國學拜業受四子書而去乾隆  
二十年以後阿睦爾薩納之故土爾扈特之嫌復絕其貿  
易不復與通焉

### 控噶爾

控噶爾西北回子最大之國也地色鄂羅斯東南界之  
外稱其王曰汗其大頭目亦謂之阿奇木伯克所轄各  
城自萬戶至十餘萬戶不等均為其汗之阿拉巴圖合  
各城計之小屬於大每一大城屬小城或三或四以至  
十餘大城阿奇木伯克共計一千四百餘員建都之城  
名務魯木極廣大南北經通馬行九十餘日東西亦然

城門二千四百個。城內大江三道。山河數澤不可勝記。宮室濶遠深邃。綿亘數百里。黃屋朱門。皆以金玉珠貝為飭。地產金銀多於石子。珊瑚珠玉數見不鮮。自鳴鐘表。綢緞。瓊屬猶多。奇異俗重大。紅寶石如拳如卵者。人懸佩黃金為錢。每文重三兩許。居人田園廬舍墓牧場。各分地界。散布而居。各種公田。猶是古人井田之法。所轄之地。有不富饒者。其汗聞之。輒親往視。暗携金銀無算。潛拋擲於人烟湊集之區。如間有拾取者。尚謂無害。如拾取人多。甚至爭拾其人汗。則惻然而憫。惕然而懼。因廣為施濟。必至比戶豐裕而後已。故入其地者。曾未見有貧窶褻褻之人。干求借貸之事。風俗敦厚。知禮。

讓彞倫攸叙與中國不殊迥非西域各國禽行獸處之  
比惟敬天地日月不知有神鬼仙佛聖人之道每日黎  
明男女禮拜唸經之音雷動猶天主教之風也最戒軍  
事其說以天地生人無非其類同奈何有以人殺人自殘  
同類之理故國雖富强從無侵凌附近弱國之理事而  
兵則精銳烏鎗可及二百餘步人以死敵為勇敗而歸  
者終身不齒於人其兵無食糧入伍之事入為農出為  
兵訓練皆於農隙亦同三代以上法也如有軍事其汗  
量敵之大小命阿奇木伯克或一或二或三各選其部下  
壯丁前往應敵鄂羅斯本其屬國歷有年所乾隆二十  
年後鄂羅斯停其貢賦七年未嘗責問而鄂羅斯反以



兵相加控噶爾發兵大戰鄂羅斯全軍覆沒喪師八萬  
察罕汗又起十萬之衆更借土爾扈特之精兵數萬與控  
噶爾再戰又復大敗以故土爾扈特大懼乾隆三十年  
棄鄂羅斯而投誠中國而控噶爾戎兵數十萬出境長  
驅直壓鄂羅斯國都察罕大恐稱臣求和定於常幣之  
外歲納童男女各五百人控噶爾許之乃捨去或曰控  
噶爾西界亦多其屬國歲修朝貢之禮如鄂羅斯云

郭罕

郭罕西域回子之一國也風俗衣冠居室土產與新疆  
回子畧同惟語言不通在葉爾羌西馬行四十日可到  
稱君曰汗其人短小男女皆長二尺餘魁梧俊偉者亦

不能過三尺。然尚氣好鬥，少有不合，即裂眦而向人，有笑其么麼者，則抽刀併命，怒不可解。其地萬山環繞，一夫當關，百夫莫過。故雖小弱，能自立於西域各國之間。羊高八九寸，長尺餘，肥美勝於他產。牛<sup>馬</sup>羊高不二尺，駝之大如內地之驢。時驅其羊數千，或數萬，來葉爾羌貿易，歸則携布而去。

### 退擺特

退擺特西域別一種也。在葉爾羌南，馬行四十五日至其地。土宇與後藏相接，無城郭宮室，鑿山為穴以居。種米麥以食，又有以游牧為生者，則以氊帳為家。人蓄髮辮，耳綴金環。其俗敬火，每晨以柴燒火，向之禮拜。有事

亦和而禱之地。斥鹵少出產。富者僅足自給。貧者多傭工於他國。勤儉刻苦。出自天性。稱君曰汗。汗亦不能饒裕。惟取所部子女。鬻於各處為奴。取其值以自贍。與博羅爾相似。

### 轄里薩普斯

轄里薩普斯在喀什噶爾之西。馬行三十日至其地。大城有三。皆其汗之阿拉巴圖土產。百菓五穀六畜黃金。人多巧思。且多妖法邪術。風俗淫惡。男女皆龍陽。其塔里扈魯斯城內。有一土埠。居城中央。他國人入城者。一見高埠。輒心神恍惚。必欲登臨。而後快。登之則必欲至其巔。至其巔則瞽不知人。逾時始蘇。手握銅錢二文。下

體已為人所汗西域回子皆畏而避之而誤入被奸者  
不少但諱而不言耳葉爾羌大阿渾阿布都哈爾庫車  
回子阿瓦茲皆曾遇其強暴人問之則怒不可解而飲  
酒過醉往往自道其實聞者無不絕倒也

哈拉替艮

哈拉替艮在安集延之南重山複嶺之中人富寡弱不  
足六七千家稱君曰比不蓄寸髮不食猪肉衣帽言語  
與安集延同羶帳為居打牲為業冬日嚴寒人皆覓山  
坳溫暖之處以大木蘆荻構屋而居人畜共處其中蓄  
糧聚草以禦冬寒至十月雪已盈尺丈三月雪融始可  
出作地產獨峯之駝

布哈拉

布哈拉回國也。在葉爾羌之西。馬行二十五日。可至。城池高厚。濶大。共十門。以十二辰布之。稱君曰汗。氣候炎熱。各無大雪。五穀一歲二收。瓜兩熟。人戶殷富。習尚技巧。錢有金銀銅三品。分別濟用。重禮拜。城內外禮拜寺二百餘處。晝夜納馬茲數十次。有私行飲酒游蕩不納馬茲者。羣以為敗類。縛至禮拜寺塔頂擲殺之。男女好修飭。河產各種魚。土產種骨羊。



附絕域諸國

瑪轄提絕域一大國也。都城八門。稱君曰汗。地廣大肥沃。土產同布哈拉。多虎豹犀象。洋磁白糖。栽絨金花。白布善製大炮。以銅為之一炮。非十象百人不能挽。運每炮盛火藥數萬觔。炮子之大者。皆二三百觔。羣子無算。一發則掀天裂地。威猛之極。呼曰按布拉克。又有自來火鎗。可及二百步。路通洋海。與西洋近。安他哈爾之城。看他哈爾之城。絕域一部落也。多山人。以核桃松子為糧。打牲為業。產白礬鐵鉛。賽拉斯之城。查爾丹衣之城。絕域一部落也。以氈帳為家。地多山石。沙灘可耕者稀。牲畜少。人戶窮苦。往往

乏食以盜劫為生無鳥鎗弓矢人佩刀一把山中生  
一種野獸形似馬頗調良可於羈勒一乘行如星電  
日可千里名曰特克亞壯圖其人懸刀騎獸四出劫  
掠遠近苦之語言與回子可通

噶拉特之城查納阿拉巴之城摩勒之城同一部落也  
言語與各國不通人以蒿草染鬚居大水濱牧放牲  
畜千萬為羣食必有魚呼其水曰阿曼多龍龜有徑  
十尺魚有長千丈者水鹹苦甘泉亦間有之

烏爾古特雅爾一部落也人皆同回子土產西瓜甜瓜  
最佳西域土產無出其右者長及七尺有圓大如車  
輪者沙棗之大如梨

盤家戡特之城○怕爾海之城○同一部落也○山多牲少○所種小麥○色白如粉○大麥碧綠○桑葚有赤白黑綠四色○皆大五六寸○國人賴以為糧○衣帽如回地阿渾之製○語言約畧可通○

巴嚩哈絕域一大國也○地廣民殷○土產各色寶石玻璃鐵白如銀五穀六畜百菓諸花皆盛○四時常有赤蟒飛舞空中○噴熱風如火○人觸輒斃○惟多葱蒜大茴以食庶得免○故其人頻頻啖之○又產獨角野牛多水牯風俗淫亂○語言與回子不通○

科罕西域一國也○築室以居耕田而食○能造旨酒琥珀色○味極清○人富饒以金銀絲緞噶朗明鏡為衣倭緞○

為緣以金銀絲繡之衣多紅黑二色以海龍為帽帽  
長三尺餘皮靴木底底下密布鐵釘不解騎馬人乘  
壯馬而行風俗獷悍往往殺人時與哈薩克交通貿易

阿薩爾之城○哈拉多拜之城○巴拉之城○哈喇他克之城○

同一部落也以豆為飯土產寶石玻璃駱駝如騾國

有一河飲之則瘤原本作癩男女滿面多毛頭纏光明

綿布子壯則多殺其父

噶爾洗別一部落也城廣而人稀多高山產獅象其人

終日謀醉男女皆然

薩穆絕域一大國也土地廣大亞於控爾噶居室修潔織

異鳥之羽為衣○光彩奪目○

阿拉克控噶爾○西北一大國也○與薩穆相類○人多巧思○冬能使之炎熱○夏能使之飛霜○以金木製為人形○為之服役○然非邪詭之術○皆人力為之也○

哈他木○絕域一國也○人多力○善射○矢不虛發○地界鄂羅斯控噶爾之間○為控噶爾屬國○

阿諦○在西海之濱○與控噶爾連界○其人皆長三四丈○無屋宇○多處山坳林麓之間○無火器○而有弓矢刀槊○矢及一里餘○然性極懦弱○畏金鼓之聲○其婦女長短亦如人形○且悉豔麗○姣好○與長人為夫婦○但不能生育○必浴於河中○而後成孕○生女如常○生男則數丈矣○喜生



啖人畜常與控噶爾戰得人馬則裂啖之控噶爾喜  
其婦人端麗往往千百成行鳴金伐鼓奮勇而前施  
放鎗炮烟火瀰漫其人皆戰慄恐怖竄匿深山控噶  
爾亦不窮追但擄其婦女而歸

扎那巴特之城色里丹衣之城別什克里之城阿色里  
巴拉之城同一部落也地多石山其人於山下取土  
移之山上而後耕種杏大色白而甘芳絕倫桑甚猶  
大人資之為糧冬夏僅皮衣一領男女遍身皆毛  
而不視

